

STUDENSKI PARLAMENT UNIVERZITETA U TUZLI

STATUT

Tuzla, april 2017.godine

Na osnovu člana 14. Zakona o udruženjima i fondacijama FBiH (Službene novine Federacije BiH, broj 45/02 (u daljem tekstu: Zakoni), Skupština Udruženja “Studentski parlament Univerziteta u Tuzli” na sjednici održanoj 06.04.2017. godine u Tuzli donijela je:

STATUT

STUDENTSKOG PARLAMENTA UNIVERZITETA U TUZLI

I. OSNOVNE ODREDBE

Član 1.

- 1) Studentski parlament Univerziteta u Tuzli (u daljem tekstu: Studentski parlament) je demokratski organizovano udruženje koje djeluje kao izborno krovno predstavničko tijelo koje zastupa interese studenata, sudjeluje u radu i odlučivanju u tijelima Univerziteta u Tuzli (u daljem tekstu Univerzitet), koordinira rad i utvrđivanje zajedničke politike studentskih vijeća organizacionih jedinica Univerziteta, te obavlja druge poslove utvrđene Zakonima.
- 2) Studentski parlament obavlja djelatnost na nivou Tuzlanskog Kantona, u skladu sa Zakonom o udruženjima i fondacijama FBiH.
- 3) Studentski parlament vrši javne ovlasti u okviru Univerziteta u Tuzli, u skladu sa opštim aktima Univerziteta i svojim opštim aktima.
- 4) Studentski parlament je nepolitička, nestranačka, nevladina i neprofitna organizacija koja poštuje načelo jednakosti svih građana te svačija prava i slobode nezavisno o rasi, boji kože, spolu, jeziku, vjeri, političkom ili drugom uvjerenju, nacionalnom ili socijalnom porijeklu, imovini, rođenju, obrazovanju, društvenom položaju ili drugim osobinama.

Član 2.

- 1) Najviši akt Studentskog parlamenta je Statut.
- 2) Statutom se propisuju temeljne odredbe i organizacija Studentskog parlamenta, način rada, sastav, nadležnosti, finansiranje, te druga pitanja od značenja za rad Studentskog parlamenta u skladu sa Zakonima i Statutom Univerziteta.
- 3) Statut Studentskog parlamenta donosi Skupština Studentskog parlamenta (u daljem tekstu: Skupština) dvotrećinskom većinom svih članova.
- 4) Statut je usklađen sa Zakonima.
- 5) Pored Statuta Studentski parlament ima i poslovnik o radu Skupštine i druga akta neophodna za funkcionisanje.

II. ČLANSTVO

Član 3.

- 1) Članovi Studentskog parlamenta su svi studenti Univerziteta, bez obzira na status.
- 2) Studenti postaju članovi Studentskog parlamenta upisom na Univerzitet u Tuzli.
- 3) Članovima Studentskog parlamenta garantovana je sloboda mišljenja i izražavanja u okviru Studentskog parlamenta.
- 4) U okviru Studentskog parlamenta nije dozvoljeno političko, vjersko i stranačko organizovanje i djelovanje u okviru rada, sjednica, projekata i sl.

Član 4.

- 1) Počasni članovi Studentskog parlamenta mogu postati studenti i nastavnici iz zemlje i inostranstva koji svojim radom, djelatnošću i materijalno-tehničkom pomoći doprinose ostvarenju programskih ciljeva i zadataka Studentskog parlamenta.
- 2) Počasne članove Studentskog parlamenta bira Predsjedništvo, o čemu obavještava Skupštinu Studentskog parlamenta.
- 3) Počasni članovi nemaju pravo odlučivanja, niti pravo da budu birani u organe i tijela Studentskog parlamenta.

III. STATUS, NAZIV I SJEDIŠTE

Član 5.

- 1) Studentski parlament je posebna organizacijska cjelina koja djeluje autonomno u okviru Univerziteta i djeluje kao pravno lice pod nazivom: Studentski parlament Univerziteta u Tuzli. Na stranom jeziku naziv Studentskog parlamenta je: Student parliament of the University of Tuzla. Skraćeni naziv Studentskog parlamenta je: SPUT.
- 2) Sjedište Studentskog parlamenta je u Tuzli, ul. Muhameda Hevajja Uskufija br. 7

Član 6.

- 1) Studentski parlament ima svoj pečat.
- 2) Pečat Studentskog parlamenta je plave boje, okruglog oblika, prečnika 50 mm, na kome je znak Studentskog parlamenta u sredini i natpisi: „Studentski parlament Univerziteta u Tuzli“, i “Student parliament of the University of Tuzla”
- 3) Štambilj je četvrtastog oblika, dužine i širine 4x2 cm, vodoravno ispisan isti tekst kao i na pečatu, s tim što je ostavljen prostor za upis datuma i broja prijema pošte.

IV. DJELOVANJE STUDENTSKOG PARLAMENTA

Član 7.

Temeljne nadležnosti Studentskog parlamenta su

- a) donosi opšte akte o svome radu;
- b) osniva radna tijela koja se bave pojedinim poslovima iz nadležnosti Studentskog

- parlamenta;
- c) bira i razrješava predstavnike studenata u Upravnom odboru, Senatu i drugim organima i tijelima Univerziteta;
 - d) bira i razrješava predstavnike studenata u organizacije, ustanove i tijela čiji je osnivač Univerzitet;
 - e) donosi godišnji plan i program aktivnosti Studentskog parlamenta;
 - f) donosi opšti akt kojim se uređuje organizaciona i funkcionalna povezanost Studentskog parlamenta sa studentskim vijećima organizacionih jedinica u sastavu Univerziteta;
 - g) objedinjuje rad studentskih vijeća organizacionih jedinica u sastavu Univerziteta;
 - h) razmatra pitanja i sprovodi aktivnosti u vezi sa obezbjeđenjem i ocjenom kvalitete nastave, reformom studijskih programa, analizom efikasnosti studiranja, utvrđivanjem broja ECTS bodova, unaprjeđenjem mobilnosti studenata, podsticanjem naučno-istraživačkog rada studenata, zaštitom prava studenata i unapređenjem studentskog standarda;
 - i) učestvuje u postupku evaluacije Univerziteta, u skladu sa Statutom Univerziteta;
 - j) ostvaruje studentsku međuuniverzitetsku i međunarodnu saradnju;
 - k) Senatu Univerziteta daje prijedloge u vezi sa utvrđivanjem prijedloga godišnjeg programa rada Univerziteta u skladu sa Statutom Univerziteta;
 - l) predlaže nadležnim organima Univerziteta plan finansiranja studentskih aktivnosti;
 - m) usvaja finansijski plan i izvještaj o finansijskom poslovanju SPUT-a;
 - n) usvaja godišnji izvještaj o radu koji podnosi predsjednik SPUT-a;
 - o) obavlja i druge poslove u skladu sa Zakonima, statutom Univerziteta, ovim Statutom i opštim aktima Univerziteta i Studentskog parlamenta;

Član 8.

Programski ciljevi i djelatnosti Studentskog parlamenta su:

- a) Poštivanje prava čovjeka i građana zagaranovanih međunarodnim sporazumima;
- b) Kontinuirana briga o statusnim pitanjima studenata u vezi sa studijem;
- c) Briga o studentskom standardu i pravima studenata;
- d) Afirmacija moralnih, naučnih, umjetničkih, kulturnih i intelektualnih vrijednosti bosanskohercegovačkog društva i na tim vrijednostima, kao i na civilizacijskim tokovima, razvoj svestrane ljudske ličnosti;
- e) Uključivanje studenata u evropske i svjetske tokove života, prevazilazeći geografske i političke regionalizacije i ograničenja, kao i uključenje studenata u sve tokove obnove i razvoja Bosne i Hercegovine;
- f) Zalaganje za slobodu naučnog, umjetničkog, nastavnog i obrazovnog procesa, te otvorenog dijaloga sa društvom;
- g) Uvođenje studenata kroz obrazovni proces u naučne/umjetničke i stručne projekte od značaja za Univerzitet i Bosnu i Hercegovinu;
- h) Uspostavljanje međunarodne saradnje na naučnom/umjetničkom; kulturno-zabavnom i

- sportskom nivou;
- i) Razvijanje ferijalne prakse u zemlji i inostranstvu, za potrebe studenata zasnovane na stručnim programima;
 - j) Obezbjedivanje stručne literature, opreme, repromaterijala i drugih sredstava za poboljšanje nastave i studentskog standarda;
 - k) Organizovanje naučnih/umjetničkih seminara, javnih tribina, kurseva i prezentacija u saradnji sa studentima, nastavnicima i stručnim saradnicima;
 - l) Organizovanje studentskih putovanja i turističkih manifestacija;
 - m) Organizovanje kulturno-zabavnih priredbi i takmičenja;
 - n) Organizovanje sportskih aktivnosti studenata;
 - o) Raspisivanje studentskih konkursa;
 - p) Ostvarivanje saradnje sa privrednim subjektima, javnim ustanovama i državnim institucijama na polju srodnih djelatnosti;
 - q) Permanentne aktivnosti na ostvarivanju optimalnih uslova socijalno-zdravstvenog i materijalnog obezbjeđenja studenata, kao i stvaranje uslova za uključivanje diplomanata u proces rada;

Član 9.

- 1) Studentski parlament može u okviru svojih djelatnosti i programskih ciljeva osnovati subjekt za privredne i druge djelatnosti pod uslovima određenim zakonima.
- 2) Djelatnosti Studentskog parlamenta se mogu ostvarivati kroz privremena i stalno formirana tijela.
- 3) Načela djelatnosti Studentskog parlamenta su: poštivanje različitosti stavova, misli i ideja, sloboda izbora, samostalnost organizacije u radu, javnost i demokratičnost mišljenja, te odgovornost pojedinca i organizacije za rad.

V. ORGANI I STRUČNA TIJELA STUDENTSKOG PARLAMENTA

Član 10.

- 1) Organi Studentskog parlamenta su: Skupština, Predsjedništvo, Predsjednik Studentskog parlamenta (u daljem tekstu: Predsjednik), zamjenik predsjednika, Generalni sekretar i student prorektor.
- 2) Skupština i Predsjedništvo mogu radi obavljanja poslova iz svoje nadležnosti osnovati stalna i privremena stručna tijela (komisije).
- 3) Lica u organima i tijelima Studentskog parlamenta mogu biti studenti koji ispunjavaju uslove iz člana 3. Statuta.

Skupština Studentskog parlamenta

Član 11.

Skupština je najviši organ Studentskog parlamenta. Skupštinu čine po pet studenata svake

organizacione jedinice u sastavu visokoškolske ustanove uljučujući i Studentski centar Univerziteta, izabrani od strane studentskih vijeća organizacionih jedinica/Udruženje studenata Studentskog centra Univerziteta na tajnim, neposrednim izborima, između kandidata predloženih na izbornim listama organizacionih jedinica, koje delegiraju Studentska vijeća organizacione jedinice, kao i Udruženje studenata Studentskog centra u Skupštinu Studentskog parlamenta.

Član 12.

Skupština:

- a) bira i razrješava Predsjedavajućeg Skupštine, Predsjednika Studentskog parlamenta i njegovog zamjenika, generalnog sekretara i članove Predsjedništva;
- b) utvrđuje prijedlog Statuta;
- c) donosi pravilnik o radu Skupštine;
- d) donosi opšte akte;
- e) stara se o zakonitom obavljanju poslova Studentskog parlamenta;
- f) razmatra i usvaja izvještaj o radu i program rada;
- g) imenuje stručna tijela Studentskog parlamenta;
- h) donosi budžet i godišnji obračun (završni račun) Studentskog parlamenta;
- i) odlučuje o dodjeli nagrada Studentskog parlamenta;
- j) prihvata izvještaje o radu tijela Studentskog parlamenta;
- k) razmatra problematiku studiranja, studentskog standarda, reforme studija i druga pitanja važna za položaj studenata i kvaliteta studija te donosi zaključke koji obavezuju druga tijela Studentskog parlamenta;
- l) obavlja druge poslove u skladu sa opštim aktima Studentskog parlamenta;

Član 13.

- 1) Skupštinu saziva Predsjedavajući Skupštine Studentskog parlamenta, u pravilu jednom u šest mjeseci. Skupština se saziva pisanim ili elektronskom poštom upućenim pozivom koji sadrži najmanje dan, sat i mjesto održavanja sjednice, prijedlog dnevnog reda i dokumentaciju nužnu za razmatranje pojedinih pitanja.
- 2) Skupština može biti redovna i vanredna. Poziv o održavanju redovne sjednice Skupštine se upućuje najmanje pet dana prije njenog održavanja. Poziv o održavanju vanredne sjednice Skupštine se upućuje najmanje tri dana prije njenog održavanja.
- 3) Ako Predsjedavajući, na prijedlog najmanje 25 članova ne sazove Skupštinu u roku od 15 dana, Skupštinu mogu sazvati predlagači.

Član 14.

- 1) Dnevni red sjednice predlaže Predsjednik Studentskog parlamenta, a utvrđuje Skupština. Skupštinom predsjedava Predsjedavajući Skupštine, ako Skupština ne odluči drugačije.
- 2) O sjednici Skupštine vodi se zapisnik koji sadrži: popis prisutnih, dnevni red, zaključke o svakoj tački dnevnog reda, te potpis zapisničara i predsjedavajućeg.
- 3) Skupština može raditi i donositi odluke ako je prisutna natpolovična većina članova, a

donosi odluke većinom glasova prisutnih članova, izuzevši slučajeve koje predviđa ovaj Statut ili opšti akt Studentskog parlamenta.

Član 15.

Rad Skupštine i način donošenja odluka bliže se određuje Poslovníkom o radu Skupštine.

Predsjedništvo Studentskog parlamenta

Član 16.

- 1) Predsjedništvo Studentskog parlamenta je izvršni organ Studentskog parlamenta.
- 2) Predsjedništvo čine predsjednik, zamjenik predsjednika, generalni sekretar, predsjednik Udruženja studenata Studentskog centra i predsjednici studentskih vijeća organizacionih jedinica Univerziteta, koji djeluju pod okriljem Studentskog parlamenta.
- 3) Radom Predsjedništva rukovodi predsjednik Studentskog parlamenta.
- 4) Članovi Predsjedništva verifikuju se većinom glasova ukupnog broja članova Skupštine SPUT-a. Ako ni jedan kandidat nije dobio takvu većinu, u drugom krugu izbora, u koji ulaze dva kandidata s najviše glasova po svakoj kategoriji članova Predsjedništva, smatra se izabranim kandidat koji je dobio većinu glasova prisutnih.

Član 17.

Predsjedništvo Studentskog parlamenta:

- a) predlaže Skupštini donošenje opštih akata;
- b) izvršava odluke Skupštine;
- c) imenuje predstavnike studenata u tijela koja su u sastavu visokog obrazovanja, ako ovim Statutom nije određeno drugačije: Senat Univerziteta, Upravni odbor Univerziteta i ostala tijela koja su u sklopu Univerziteta;
- d) inicira formiranje stručnih tijela za obavljanje poslova iz nadležnosti Studentskog parlamenta;
- e) podnosi izvještaj o svome radu Skupštini;
- f) inicira vanredno zasjedanje Skupštine;
- g) izrađuje finansijski plan Studentskog parlamenta;
- h) vodi poslovanje Studentskog parlamenta;
- i) donosi Pravilnik o izborima;
- j) Predsjedništvo ima nadležnost nad studentskim vijećima/Udruženjem organizacionih jedinica na Univerzitetu u Tuzli u njihovom organizovanju i radu, što se bliže uređuje ovim Statutom i poslovnikom o radu Predsjedništva;
- k) donosi i sprovodi odluke i akte koji prema ovom Statutu nisu u nadležnosti drugih tijela Studentskog parlamenta;

Član 18.

- 1) Predsjedništvo donosi odluke na sjednicama koje saziva i kojima predsjedava Predsjednik.
- 2) Predsjedništvo može odlučivati ako je na sjednici prisutna nadpolovična većina od ukupnog broja članova, a odluke donosi većinom glasova ukupnog broja prisutnih članova. Ukoliko u slučaju glasanja bude isti broj glasova, onda je Predsjednikov glas odlučujući.

- 3) U slučaju hitnosti Predsjednik može tražiti da članovi Predsjedništva o pojedinom pitanju glasaju putem elektronske pošte.
- 4) Generalni sekretar Studentskog parlamenta učestvuje u radu Predsjedništva bez prava odlučivanja.
- 5) Skupština može poslovníkom detaljnije urediti rad Predsjedništva.

Član 19.

- 1) Predsjednika Studentskog parlamenta bira Skupština na mandat od godinu dana, koji se može jednom ponoviti.
- 2) Predsjednik se bira većinom glasova ukupnog broja članova Skupštine. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Predsjednik ne može biti lice osuđivano za krivično djelo. Predsjednik:
 - a) predstavlja i zastupa Studentski parlament;
 - b) predsjedava Predsjedništvom, te predlaže dnevni red;
 - c) predlaže zamjenika predsjednika Studentskog parlamenta;
 - d) može podnijeti inicijativu Skupštini za smjenu zamjenika predsjednika Studentskog parlamenta;
 - e) predlaže generalnog sekretara Studentskog parlamenta;
 - f) može podnijeti inicijativu za smjenu generalnog sekretara i članove predsjedništva;
 - g) predlaže u ime Predsjedništva program rada i razvoja Studentskog parlamenta;
 - h) između sjednica Predsjedništva vodi poslovanje Studentskog parlamenta;
 - i) podnosi obavezan izvještaj o radu Skupštini na svakih šest mjeseci;
 - j) čuva pečat i ima ovlaštenje da ga koristi;
 - k) potpisuje opšte akte i finasijsku dokumentaciju Studentskog parlamenta;
 - l) obavlja i druge poslove utvrđene Zakonima i ovim Statutom;

Član 20.

- 1) Zamjenika predsjednika na prijedlog Predsjednika bira Skupština. Mandat zamjenika predsjednika odgovara mandatu Predsjednika.
- 2) Zamjenik predsjednika se bira većinom glasova ukupnog broja članova Skupštine. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Zamjenik predsjednika obavlja poslove iz nadležnosti Predsjednika u slučaju njegove spriječenosti za obavljanje istih ili po njegovom ovlaštenju.

Član 21.

- 1) Generalnog sekretara Studentskog parlamenta na prijedlog Predsjednika bira i razrješava Skupština. Mandat generalnog sekretara odgovara mandatu Predsjednika.

- 2) Generalni sekretar se bira većinom glasova ukupnog broja članova Skupštine. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih. Generalni sekretar:
 - a) vodi zapisnik sa sjednica Skupštine i Predsjedništva;
 - b) pomaže predsjedniku u radu i obavlja poslove koje mu Predsjednik povjeri;
 - c) stara se o arhivi Studentskog parlamenta;
 - d) je student u skladu sa članom 3. ovog Statuta;

Stručna tijela Studentskog parlamenta

Član 22.

- 1) Komisije su stručna tijela Studentskog parlamenta koja obavljaju poslove iz svoje nadležnosti propisane ovim Statutom i opštim aktima.
- 2) Predsjednik Komisije se bira većinom glasova ukupnog broja članova Skupštine. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Komisija osim predsjednika Komisije može imati još 2, 3 ili 4 člana. Sastav Komisije Predsjedništvu predlaže predsjednik Komisije, iz redova studenata Univerziteta.
- 4) Predsjednik Komisije imenuje svog zamjenika među članovima svoje Komisije.
- 5) Predsjednik Komisije podnosi izvještaj o radu Komisije najmanje jednom u tri mjeseca Predsjedništvu Studentskog parlamenta.

Član 23.

Stalne komisije Studentskog parlamenta su:

- a) Komisija za nastavu i reformu;
- b) Komisija za naučno-istraživački rad;
- c) Komisija za zdravstvo, studentski standard i praksu;
- d) Komisija za ekonomiju i međunarodnu saradnju;
- e) Komisija za kulturu i sport;
- f) Komisija za informisanje i odnose sa javnošću;

Član 24.

- 1) Skupština svojom Odlukom formira i ukida komisije.
- 2) Postupak razrješenja predsjednika Komisije i cijele Komisije obavlja se po postupku i na način predviđen za izbor predsjednika Komisije

Nadzorni odbor

Član 25.

- 1) Nadzorni odbor Studentskog parlamenta je nadzorni organ Studentskog parlamenta.
- 2) Nadzorni odbor je samostalan u svom radu i oslanja se na važeće zakone, a svoje djelovanje detaljnije uređuje poslovníkom o radu.
- 3) Nadzorni odbor čini tri člana iz reda članova Skupštine.

- 4) Članovi Nadzornog odbora biraju se većinom glasova ukupnog broja članova Skupštine. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najviše glasova po svakoj kategoriji članova Predsjedništva, smatra se izabranim kandidat koji je dobio većinu glasova prisutnih.
- 5) Momentom izbora članova u organ Nadzornog odbora suspenduje se pravo člana u Skupštini.

Član 26.

Nadzorni odbor Studentskog parlamenta:

- a) nadgleda rad Studentskog parlamenta;
- b) nadgleda rad studentskih vijeća organizacionih jedinica u sastavu Studentskog parlamenta;
- c) može da pregleda i provjerava poslovne knjige, dokumente i druge akte Studentskog parlamenta;
- d) pregleda i razmatra izvještaje predsjednika i članova Predsjedništva;
- e) pregleda i razmatra izvještaje studenta prorektora i članova Vijeća studenata prodekana;
- f) na sjednicama Skupštine izvještava o svom radu i zaključcima;
- g) daje mišljenja u slučajevima određenim ovim Statutom i drugim opštim aktima u roku od četrnaest dana po prijemu dopisa;
- h) nadgleda regularnost izbora studentskih predstavnika;
- i) predlaže razrješavanje funkcije lica u organima i tijelima Studentskog parlamenta;

Član 27.

- 1) Nadzorni odbor donosi odluke na sjednicama koje saziva predsjedavajući Nadzornog odbora.
- 2) Predsjedavajućeg Nadzornog odbora biraju članovi Nadzornog odbora na prvoj sjednici Nadzornog odbora.
- 3) Nadzorni odbor može odlučivati ako je na sjednici prisutno najmanje dva člana, a odluke donosi većinom ukupnog broja glasova. Ukoliko u slučaju glasanja bude isti broj glasova, onda je glas predsjedavajućeg odlučujući.
- 4) U slučaju hitnosti član Nadzornog odbora može tražiti da članovi Nadzornog odbora o pojedinom pitanju glasaju putem elektronske pošte.
- 5) Skupština može poslovníkom detaljnije urediti rad Nadzornog odbora.

Student prorektor

Član 28.

Student prorektor:

- a) predstavlja Studentski parlament u Upravnom odboru Univerziteta;
- b) učestvuje u radu Predsjedništva Studentskog parlamenta;
- c) rukovodi radom Vijeća studenata prodekana;
- d) predlaže mjere za unapređenje studentskog standarda i kvaliteta nastave i prati stanje u toj oblasti;
- e) koordinira rad studenata prodekana i održava redovne sastanke sa njima;
- f) obavlja i druge poslove koji se odnose na studentska pitanja;

Član 29.

- 1) Student prorektor vodi brigu da su stavovi koje iznosi pred svim organima i tijelima Univerziteta zvanični stavovi Studentskog parlamenta.
- 2) Mandat studenta prorektora traje godinu dana, sa mogućnošću jednog ponovnog izbora.
- 3) Student prorektor obavezan je o svom radu podnijeti izvještaj Skupštini najmanje jednom u šest mjeseci.

Član 30.

Student prorektor ima sjedište na Univerzitetu koje mu pruža administrativno-tehničku pomoć

Prestanak funkcije i postupak razrješenja lica u organima i tijelima

Član 31.

- 1) Licima u organima i tijelima Studentskog parlamenta prestaje funkcija prije isteka vremena na koje je izabran: ostavkom, završetkom studija, razrješenjem ili istekom mandata člana Studentskog parlamenta.
- 2) U slučaju podnošenja ostavke, licu prestaje funkcija danom održavanja sjednice na kojoj je podnesena ostavka, odnosno na prvoj narednoj sjednici organa ili tijela u kojem djeluje, ako je ostavka podnesena između dvije sjednice.
- 3) Prestanak funkcije konstatuje Skupština.

Član 32.

- 1) Skupština može razriješiti dužnosti lica u organima i tijelima Studentskog parlamenta prije isteka mandata, u skladu sa postupkom predviđenim za izbor lica u organe i tijela Studentskog parlamenta.
- 2) Lice u organima i tijelima Studentskog parlamenta može biti razriješeno mandata ako:
 - a) prekrši Pravilnik o disciplinskoj odgovornosti studenata;
 - b) ne ispunjava dužnosti u nadležnosti njegove funkcije;
 - c) krši odredbe Zakona, Statuta Univerziteta, ovog Statuta i opštih akata Studentskog parlamenta;
 - d) zloupotrijebi položaj;
- 3) Prijedlog za razrješenje funkcije lica u organima i tijelima Studentskog parlamenta može pokrenuti Predsjednik, natpolovična većina članova Predsjedništva, Nadzorni odbor i jedna trećina članova Skupštine, podnošenjem pismenog zahtjeva.
- 4) Zahtjev iz stava 3. ovog člana mora sadržati i odgovarajuće detaljno obrazloženje;
- 5) Glasanje o razrješenju lica sa funkcije obavlja se na narednoj sjednici Skupštine, koja mora biti održana najkasnije u roku od trideset dana od dana podnošenja prijedloga o razrješenju funkcije.
- 6) Ako Skupština ne donese odluku o razrješenju lica sa funkcije, novi prijedlog za razrješenje ne može se podnijeti u roku od najmanje dva mjeseca.

Član 33.

- 1) U slučaju prestanka funkcije lica u organima i tijelima Studentskog parlamenta prije

mandata na koji je biran, Skupština će na istoj, a najkasnije na narednoj sjednici započeti postupak izbora lica na tu funkciju, u skladu sa odredbama ovog Statuta i Poslovnika o radu Skupštine.

- 2) Ako je predsjednik Studentskog parlamenta razriješen funkcije prije isteka mandata, dužnost predsjednika Studentskog parlamenta, do izbora novog predsjednika, vrši zamjenik predsjednika Studentskog parlamenta.

VI. STUDENTSKA VIJEĆA/UDRUŽENJE STUDENATA ORGANIZACIONIH JEDINICA U SASTAVU UNIVERZITETA U TUZLI

Član 34.

Studentska vijeća organizacionih jedinica i Udruženje studenata Studentskog centra u sastavu Univerziteta (u daljem tekstu: studentska vijeća) djeluju pod okriljem Studentskog parlamenta. Studentska vijeća obavljaju djelatnost na nivou organizacione jedinice na kojoj su osnovani u skladu sa opštim aktima Univerziteta, ovim Statutom i svojim opštim aktima.

Član 35.

Temeljne zadaće studentskog vijeća odgovaraju onima koje su članom 8. ovog Statuta predviđene za Studentski parlament.

Član 36..

- 1) Skupština je najviši organ studentskog vijeća kojeg čine predstavnici studenata sa svake studijske godine koji se biraju po postupku utvrđenim ovim Statutom I Statutom studentskog vijeća.
- 2) U postupku izbora članova skupštine studentskog vijeća nastojat će se osigurati proporcionalna zastupljenost studenata sa svih odsjeka i studijskih programa te organizacione jedinice.
- 3) Skupštinu na nivou organizacionih jedinica čine predstavnici studenata svih godina studija prvog ciklusa studija, i po jedan student predstavnik sa drugog i trećeg ciklusa studija:
 - a) Na organizacionim jedinicima koji imaju pet i manje odsjeka i nemaju zajedničkih godina studija, biraju se po tri studenta sa svake studijske godine odsjeka, i po jedan student sa drugog i trećeg ciklusa studija;
 - b) Na organizacionim jedinicima koji imaju pet i manje odsjeka, i imaju zajedničke godine studija, biraju se, na zajedničkim godinama po tri studenta po odsjeku, a za godine studija koje nisu zajedničke, po tri studenta sa svake godine odsjeka, i po jedan student sa drugog i trećeg ciklusa studija;
 - c) Na organizacionim jedinicima koji imaju šest i više odsjeka, bira se po jedan student sa svake godine po odsjeku, i po jedan student sa drugog i trećeg ciklusa studija;
 - d) Na organizacionim jedinicima koji nemaju odsjeke bira se po devet studenata sa svake godine studija, i po jedan student sa drugog i trećeg ciklusa studija;
- 4) Skupština bira svoga predsjednika, dopredsjednika, sekretara i zapisničara, te predsjednika, dopredsjednika i članove Upravnog odbora Studentskog vijeća, nadpolovičnom većinom glasova članova Skupštine. Ako ni jedan kandidat nije dobio takvu većinu, u drugom krugu izbora, u koji ulaze dva kandidata s najviše glasova po svakoj kategoriji članova Predsjedništva, smatra se izabranim kandidat koji je dobio

- većinu glasova prisutnih.
- 5) Mandat članova Skupštine, Upravnog odbora kao i svih izabраниh predstavnika traje jednu godinu, sa mogućnošću još jednog ponovnog izbora.
 - 6) Nadležnost, broj, sastav, trajanje mandata i način obrazovanja skupštine i drugih organa studentskog vijeća uređuje se opštim aktom studentskog vijeća koji mora biti usklađen sa Statutom Univerziteta i ovim Statutom.
 - 7) Upravni odbor, na nivou fakulteta, bira Skupština i to:
 - a) za organizacione jedinice sa pet i manje studijskih odsjeka, po dva studenta sa svakog odsjeka;
 - b) za organizacione jedinice koji imaju više od pet studijskih odsjeka, po jedan student sa odsjeka;
 - c) za organizacione jedinice koji imaju dva studijska odsjeka biraju se po četiri studenta sa odsjeka;
 - d) za organizacione jedinice bez studijskih odsjeka, biraju se po tri studenta sa svake godine studija;
 - e) jednog člana iz drugog ili trećeg ciklusa studija;

Član 37.

- 1) Predsjednik studentskog vijeća je u pravilu i student prodekan te organizacione jedinice.
- 2) Ukoliko Predsjednik studentskog vijeća ne želi biti na toj funkciji, skupština studentskog vijeća, na prijedlog Predsjednika, bira drugo lice iz organa studentskog vijeća.
- 3) Djelovanje studenta prodekana organizacione jedinice uređeno je statutom studentskog vijeća i drugim opštim aktima.
- 4) Student prodekan je član Vijeća studenata prodekana Univerziteta.
- 5) Student prodekan:
 - a) prima prigovore studenata koji se odnose na njihova prava i raspravlja o njima s nadležnim organima organizacione jedinice;
 - b) savjetuje studente o načinu ostvarivanja njihovih prava;
 - c) može sudjelovati u disciplinskim postupcima protiv studenata radi zaštite njihovih prava;
 - d) stara se za studentski standard i kvalitet nastave;
 - e) obavlja druge poslove utvrđene opštim aktima iz stava 2. ovog člana;

VII. VIJEĆE STUDENATA PRODEKANA UNIVERZITETA

Član 38.

- 1) Vijeće studenata prodekana Univerziteta čine studenti prodekani organizacionih jedinica u sastavu Univerziteta i student prorektor Univerziteta.
- 2) Vijeće studenata prodekana radi u sjednicama po potrebi.
- 3) Student prorektor predsjedava Vijećem studenata prodekana, po funkciji.
- 4) Vijeće studenata prodekana donosi: svoj poslovnik, mišljenja, prijedloge, zaključke i inicijative.

VIII. ORGANIZACIJA IZBORA STUDENTSKOG PARLAMENTA

Član 39.

Pravo da biraju i budu birani u organe i tijela Studentskog parlamenta imaju svi studenti Univerziteta, u skladu sa članom 3. I članom 11. Ovog Statuta.

Član 40.

- 1) Izbori za organe i tijela Studentskog parlamenta/Studentska vijeća održavaju se, u pravilu između 15. i 30. novembra u tekućoj akademskoj godini.
- 2) Izbore za Studentski parlament i Studentska vijeća raspisuje Predsjednik Skupštine Studentskog parlamenta.
- 3) Izborna komisija obrazuje se od strane Skupštine.
- 4) Kandidature se podnose izbornoj komisiji najkasnije sedam dana prije održavanja izbora.
- 5) Izborna komisija se sastoji od pet članova iz reda članova Skupštine. Izborna komisija imenuje biračke odbore i utvrđuje popis birača.
- 6) Članovi biračkih odbora, kandidati na izborima i lica u organima i tijelima Studentskog parlamenta s važećim mandatom ne mogu istovremeno biti i članovi izborne komisije.
- 7) Kandidati na izbornim listama studentskih vijeća/Udruženje studenata Studentskog Centra imaju pravo prigovora na tok i rezultate izbornog postupka na način i u rokovima definisanim Poslovníkom o radu Skupštine.

Član 41.

Izborna procedura preciznije se uređuje Pravilnikom o izborima, koji donosi Predsjedništvo, a naročito:

- a) način predlaganja i utvrđivanja kandidata;
- b) način održavanja izbora;
- c) vođenje biračkog spiska;
- d) uslovi za validnost kandidatura;
- e) mjesto i vrijeme izbora;
- f) trajanje glasanja;
- g) tajnost glasanja;
- h) način provjere identiteta kandidata, birača i drugih osoba koje učestvuju u izbornom postupku;
- i) učešće posmatrača;
- j) način postupanja za slučaj jednakog broja glasova pojedinih kandidata;
- k) prigovor na tok i rezultate izborne procedure;

Član 42..

Nadzor i kontrolu legalnosti izbora obavlja Nadzorni odbor u skladu sa svojim nadležnostima.

IX. FINANSIRANJE STUDENTSKOG PARLAMENTA

Član 43.

Studentski parlament se finansira iz sljedećih izvora:

- a) iz sopstvenih prihoda;
- b) od upisnina studenata prilikom upisa godine studija;

- c) od poklona, donacija i zavještanja;
- d) iz članarina, zakupnina;
- e) iz drugih izvora u skladu sa Zakonima, opštim aktima Univerziteta i principima Studentskog parlamenta;

Član 44..

Studentski parlament autonomno raspolaže sredstvima za rad koja se vode na sopstvenom računu u skladu sa Zakonima i opštim aktom Univerziteta, te budžetom Studentskog parlamenta.

Član 45.

Predsjedništvo donosi godišnji finansijski plan Studentskog parlamenta i usvaja izvještaj o poslovanju i godišnji obračun na prijedlog Predsjednika.

Član 46.

Sredstva s namjenom za studentska vijeća/Udruženje studenata Studentskog Centra, prema međusobnom sporazumu studentskog vijeća i Studentskog parlamenta, uplaćuju se na njihov račun.

Član 47.

Korisnici budžetskih sredstava Studentskog parlamenta dužni su namjenski trošiti doznačena sredstva u skladu sa Zakonima, Statutom i budžetom Studentskog parlamenta, te dostaviti izvještaj Predsjedništvu odmah po izvršenom projektu.

X. JAVNOST RADA STUDENTSKOG PARLAMENTA

Član 48.

Rad Studentskog parlamenta je javan. Javnost rada se ostvaruje putem:

- a) prisustva predstavnika javnih medija sjednicama Skupštine;
- b) saopštenja, izjava i drugih obraćanja članova Predsjedništva;
- c) objavljivanja na službenoj web-stranici Studentskog parlamenta;

Član 49.

Sjednice organa i tijela Studentskog parlamenta mogu biti zatvorene za javnost i otvorene za javnost, ovisno o pozivu predsjedavajućeg Skupštine.

XI. ZAVRŠNE ODREDBE

Član 50.

Statut Studentskog parlamenta usvaja se dvotrećinskom većinom ukupnog broja članova Skupštine.

Član 51.

- 1) Izmjene i dopune Statuta vrše se po postupku predviđenom za njegovo donošenje.
- 2) Izmjene i dopune Statuta može predložiti svaki član Skupštine.

- 3) Autentično tumačenje ovog Statuta i svih Odluka Studentskog parlamenta daje Studentski parlament svojom Odlukom.

XII. PRELAZNE ODREDBE

Član 52.

Udruženja/Asocijacije studenata organizacionih jedinica matičnih fakulteta/akademija na Univerzitetu su dužna u narednih šest mjeseci izvršiti preregistraciju Udruženja/Asocijacija u Studentska vijeća fakulteta/akademija ili izvršiti registraciju novih Studentskih vijeća matičnih fakulteta/akademija izuzev Udruženja studenata Studentskog centra Univerziteta, odnosno sprovesti indirektne izbore pod supervizijom Studentskog parlamenta, u skladu sa ovim Statutom. Do izbora rukovodioca studentskih vijeća, nadležnost studentskog vijeća u prelaznom periodu ima registrovano Udruženje Organizacione jedinice.

Član 53.

Studentski parlament prestaje sa radom u slučajevima određenim Zakonom o Udruženjima i Fondacijama FBiH, kao i dvotrečinskom Odlukom Skupštine Studentskog parlamenta o prestanku daljeg rada.

Član 54.

U slučaju prestanka rada Studentskog parlamenta, imovina i sredstva Studentskog parlamenta raspodjeljuju se na osnovu Odluke koju donosi Skupština Studentskog parlamenta.

Član 55.

Ovaj Statut stupa na snagu danom donošenja, a objavljuje se na web stranici Studentskog parlamenta.

U Tuzli, 06.04.2017. god

**PREDSJEDAVAJUĆI SKUPŠTINE STUDENTSKOG
PARLAMENTA UNIVERZITETA U TUZLI**

Amila Omersoftić